



EGUNKARIA
PRENTSA KLUBEAN HITZALDIA. Juan Jose Ibarretxe, Parisko Prentsa Klubean eskaini hitzaldian, atzo, ondoan Bernard de la Villardiere duela.

BILERA ESTATU IDAZKARIAREKIN

AHT eta marea beltza aipagai

Bisitaldiko hirugarren buruz buruko bilera Dominique Bousseureau Garraio eta Itsaso Arazoetarako Estatu idazkariarekin zuen. Batetik, *Prestige* petroliontziak eragin marea beltza izan zuten aipagai. Egoeraren aurrean eta gerora gerta daitezkeen gisa bereko istripuen aurrean «koordinazioa zaintzeko premia» azpimarratu zuten biek. Bigarren gaia Abiadura Handiko Trenari lotua zen. Ibarretxek Estatu idazkariari argiki adierazi zion «egitasmo oso garrantzitsua» dela «Euskadi eta Frantziaren-tzat». Eusko Jaurlaritzak, berriz, AHT proiektua lehenbailehen obratuko duela jakinarazi zuen Ibarretxek, eta ildo horretan esan zuen Gobernu Kontseiluak Gipuzkoako bost zati lehiaketara ateratzea deliberatu zuela azken bileran.

Arratsalde hasieran Andre Dulait senatariarekin, Kanpo Arazoetarako Batzordeko lehendakariarekin bildu zen Euskal Herriko egoera politikoaz hitz egiteko. Bezperan, Jean-Paul Huchon Ile de France eskualdeko kontseiluko buruarekin bildu zen. EAEren antolaketa eta esku-menak aipatu zizkion. Huchon sozialista, eskualde kontseilu bateko lehendakari gisa, batez ere Kontzertu Ekonomikoaren sistemaz interesatu zen. Dezentralizazio prozesuan «eredu» gisa erabil dezaketela esan zion.



JON BERNARDEZ
ILE DE FRANCE-KO PRESIDENTEAREKIN. Ibarretxek makila oparitu zion Ile de France eskualdeko kontseiluko presidente Jean-Paul Huchoni, herenegun Parisen eginiko bileran.

Argien Hiria argitu nahiz

JUAN JOSE IBARRETXE PARISEN. Atxikimendu libreko itun proposamena aurkeztu du Frantziako hiri nagusian, «aterabide baten konponbideez» hitz egiteaz harro

Eneko Bidegain | PARIS

Goizik iluntzen du Parisen abenduan, eta ikaragarriko hotza da aste honetan. Eguberriak hurbiltzen ari direla, Frantziako hiri nagusiko karrikak dena argitan ego-

nagatik, karrika nahiko ilun batean hasi zuen bisita Juan Jose Ibarretxe EAEko lehendakariak. Parisko hautetsiak, euskal diaspora eta kazetariak Euskal Herriko egoeraz argitu nahi izan zituen atzo eta herenegun, baina batez ere bere proposa-

mena aurkeztu zien, hala nola atxikimendu libreko itunari buruzkoa.

Lehen ere Parisen izana dela zehaztu zuen, baina beti «arazotaz» mintzatzeko. Pozik agertu zen, aste honetako bisitan, «aterabide proposamenetaz»

mintzatzera etorri baita. Hori behin eta berriz errepikatu zuen: astearte arratsean Institutu Katolikoan eskaini zuen hitzaldian lehenik, Bakerako ikerketa zentroak gonbidaturik; eta atzo goizeko prentsaurrekoan ondotik, Frantziako prentsa klubak gonbidaturik. Atzo bertan PP eta PSOE alderdietako ordezkari bat Parisen zegoela ere nabarmendu zuen. «Beren ideien azaltzera» joan zirela eta hori ere «oso baikorra» dela adierazi zuen Ibarretxek. «Hitz egin dezagun, ea zein diren gure ideiak arazoaren konpontzeko. Proposamen guztiak ongi etorriak dira». PSOE eta PPren ituna «zilegiztat» jo zuen eta «errespetatu» behar dela gehitu zuen, berea ere «errespetatzea» nahi duen bezala. «Proposamen eta ideia ezberdinak ditugu, baina eztabaidatu behar da».

Ibarretxek «baikortasuna» erakutsi zuen, bere proposamena dela eta. «Bide bat azaltzen ari gara eta zentzu horretan baikor izan behar dugu. Ilusioz jokatu behar dugu, hori da bizitzaren gauzarik garrantzitsuenak, arazoak konpontzeko». Baikortasun hori bertzei zabaltzera etorria zela ageri zen. Herenegun hitzaldiaren ondotik, entzuleak bere hoteleko harrera gelara gonbidatu zituen, hitz egiten jarraitzeko. Prentsaurrekoaren ondotik luzaz hitz egin zuen zenbait kazetariarekin, espainiar hedabideetakoekin bereziki, bere ikusmoldeaz konbentziazten ahalegintzeko.

Interdependentzia eta subiranotasun partekatua

Hitzaldiko entzuleen eta atzoko kazetarien galderei «laguntasunaren» mezuarekin erantzuten zien. «Ez ote duzu uste Euskal Herriak independentzia hartzen badu, Aznarrek ezin izango duela onartu, bertze erkidegoek ere galdetzen badute Espainia deseginen litzatekeelako?». Frantsesen betiko kezka, Institutu Katolikoko entzule baten ahotik. Ibarretxeren hitzaldiko zati bat ez zuela entzuna iduri zuen. EAEko lehendakariak berriz errepikatu zuen bere proiektua ez dela «independentzia», baizik eta «XXI. mendean» kokatzen dela. «XXI. mendea ez da independentziaren eta subiranotasunaren mendea, baizik eta interdependenziaren eta subiranotasun partekatuarena». Espainiarekiko loturen mantentzearen alde mintzatu zen behin eta berriz. Bertze herrialdeei dagokienez, «haiek erabaki» behar dutela zehaztu zuen.

Gisa berean errepikatu zuen «euskal gizarteak erabakiko» duela «zer mailatako autogobernua» nahi duen etorkizunetan; EAEkoek beren aldetik, Nafarrek bestetik eta «Euska Herri frantseseko» biztanleek beste-